



KEMENTERIAN SUMBER ASLI, ALAM SEKITAR
DAN PERUBAHAN IKLIM

KENYATAAN MEDIA

NRECC KOMITED MANFAAT PERUNTUKAN BELANJAWAN 2023 MELESTARI ALAM SEKITAR

Bertemakan “Membangun Malaysia MADANI”, Belanjawan 2023 yang dibentangkan semalam, menunjukkan komitmen kerajaan untuk memacu pertumbuhan ekonomi yang mampan, inklusif dan seimbang menepati keperluan setiap pihak berkepentingan, berpaksikan keadilan sosial untuk merapatkan kesejangan di samping mereformasi institusi dan tatakelola mengembalikan keyakinan pelabur.

Berteraskan dengan nilai-nilai ini, Kementerian Sumber Asli, Alam Sekitar dan Perubahan Iklim (NRECC) telah diberikan tanggungjawab yang besar setelah diamanahkan dengan peruntukan sebanyak **RM6.53 bilion pada tahun 2023**, peningkatan sebanyak 8.40% berbanding tahun lepas. Ini sekali gus memperlihatkan penekanan Kerajaan Persekutuan dalam 'agenda hijau' di samping menyediakan infrastruktur berkualiti dan menyeluruh kepada rakyat dengan mengambil kira cabaran semasa dan keperluan masa hadapan.

Melalui jumlah tersebut, NRECC menerima sebanyak RM1.674 bilion peruntukan mengurus manakala sebanyak RM4.87 bilion diberikan bagi peruntukan pembangunan.

Perubahan Iklim pasti memberi kesan kepada semua, oleh itu peruntukan yang disalurkan ini bakal memberi lebih ruang kepada Kementerian untuk menumpukan kepada usaha-usaha pembangunan kelestarian alam sekitar bagi menggalakkan amalan hijau, mempertahankan khazanah semula jadi negara dan pengurusan bencana yang efisien dan menyeluruh.

Kementerian juga menyambut baik pengumuman YAB Perdana Menteri bahawa tarif elektrik dikekalkan bagi semua pengguna domestik dan perniagaan PKS. Ini bermaksud, tarif elektrik pengguna domestik serta perniagaan PKS dan industri makanan yang tergolong dalam kategori tarif berkenaan akan kekal bagi tempoh 1 Januari hingga 30 Jun 2023 ini. Secara keseluruhannya, Kerajaan telah memberi komitmen sebanyak RM10.76 bilion untuk subsidi elektrik.

Melalui peruntukan mengurus, sejumlah RM39.3 juta diperuntukkan untuk Program Perlindungan Biodiversiti dan Rondaan (*Biodiversity Protection and Patrolling* (BP3). Dengan pelaksanaan program BP3 ini, ia dapat meningkatkan strategi rondaan penguatkuasaan di hutan-hutan simpan seterusnya khazanah biodiversiti negara dapat dikekalkan untuk generasi akan datang.

Susulan itu, Kerajaan mengumumkan peruntukan sejumlah RM50 juta bagi inisiatif perluasan ‘Renjer Komuniti’ di seluruh negara dengan keutamaan kepada orang asli, veteran dan polis.

Seperti mana diumumkan oleh YAB Perdana Menteri, melalui peruntukan *Ecological Fiscal Transfer for Biodiversity Conservation* (EFT) kepada Kerajaan Negeri akan ditingkatkan kepada RM150 juta setahun berbanding RM70 juta tahun lalu. Peruntukan EFT ini dijangka akan memanfaatkan negeri-negeri utama yang menerima EFT sebelum ini seperti Sarawak, Sabah, Pahang, Terengganu, Perak, Kelantan dan Kedah. Agihan ini akan mengambil kira pewartaan kawasan perlindungan baharu termasuk habitat harimau dan mempergiat penanaman semula pokok di kawasan terosot. Pada masa yang sama, sejumlah RM38 juta turut disediakan bagi program perlindungan harimau, gajah dan spesies hidupan liar.

Sejumlah RM90 juta diperuntukkan melalui peruntukan mengurus kepada Indah Water Konsortium (IWK) yang telah menunjukkan peningkatan yang memberangsangkan bagi meningkatkan pengendalian dan penyelenggaraan sistem pembetungan yang efisien.

Di bawah Tekad I: Pemacuan Ekonomi Yang Terangkum dan Mampan menerusi Ikhtiar 3, Kerajaan cakna untuk mendepani musibah bencana, termasuklah banjir dan hakisan pantai, melalui persiapan menghadapi bencana terutamanya melibatkan projek tebatan banjir dan amalan hijau.

Bagi memastikan projek tebatan banjir benar-benar mencapai matlamatnya, projek cakna rakyat dan berimpak tinggi mesti dilaksanakan secara tender supaya menjamin nilai faedah terbaik dan memberi penjimatan kepada Kerajaan.

Menerusi usaha ini, negara dijangka mampu melakukan penjimatan antara RM2 bilion daripada jumlah RM15 bilion peruntukan tebatan banjir yang disediakan sebelum ini. Kementerian komited mengikut saranan oleh YAB Perdana Menteri untuk melaksanakan perolehan dijalankan secara tender terbuka termasuk disiarkan secara langsung menerusi saluran media seperti televisyen dan media sosial rasmi Kerajaan.

Sebanyak enam (6) projek tebatan banjir akan di-tender semula dengan segera pada tahun ini antaranya melibatkan,

- a) Rancangan Tebatan Banjir di Sungai Johor, Kota Tinggi, Johor;
- b) Pembinaan kolam takungan dwifungsi bagi tebatan banjir dan sumber bekalan air mentah di Sungai Rasau dan Sungai Klang, Selangor; dan
- c) Pembangunan Lembangan Sungai Bersepadu Sungai Golok, Fasa 3, Kelantan.

Bagi memperkasa amalan hijau melalui inisiatif melestarikan alam sekitar, tekad Kerajaan adalah untuk mempertahankan khazanah semula jadi negara. Komitmen ini dilibatkan dengan memelihara biodiversiti dan pengurusan hutan yang pada masa sama mengurangkan kebergantungan Kerajaan Negeri kepada hasil balak. Sebanyak RM400 juta juga diberikan kepada kerajaan negeri berdasarkan tahap pembangunan ekonomi, infrastruktur dan kesejahteraan hidup yang membudayakan amalan hijau.

Kerajaan juga bercadang untuk melanjutkan tempoh insentif *Green Investment Tax Allowance* (GITA) dan *Green Income Tax Exemption* (GITE) hingga 31 Disember 2025 dengan menambah baik tempoh galakan dari tiga (3) kepada lima (5) tahun bagi aktiviti hijau yang layak.

Tumpuan juga diberikan bagi menyokong projek pembangunan Pelabuhan Sanglang di Perlis bagi mengendalikan kargo petroleum dan kargo pukal yang akan memberi nilai tambah kepada ekonomi Perlis. Dalam masa yang sama, Kerajaan akan membina struktur baharu hakisan pantai antara Kuala Sanglang, Perlis ke Kuala Jerlun Kubang Pasu, Kedah.

Kementerian akan memperhalusi setiap komitmen kerajaan secara terperinci untuk memerangi perubahan iklim serta impaknya kepada negara. Justeru, Kementerian akan terus mengambil langkah proaktif untuk membantu rakyat seterusnya memberi impak positif kepada negara.

NIK NAZMI NIK AHMAD
MENTERI SUMBER ASLI, ALAM SEKITAR DAN PERUBAHAN IKLIM (NRECC)

25 FEBRUARI 2023

